

CONVOCATORIA DE AXUDAS A ENTIDADES LOCAIS DE GALICIA PARA O FINANCIAMENTO DE ACTUACIÓNS EN MATERIA DE BIORRESIDUOS DE COMPETENCIA MUNICIPAL, PARA OS ANOS 2023 E 2024 (CÓDIGO PROCEDEMENTO MT975P)

PREGUNTAS FRECUENTES

1.- Por que deberían as entidades locais aproveitar as oportunidades de financiamento que ofrece esta convocatoria?

Esta convocatoria ten por finalidade poñer ao dispor das entidades locais recursos económicos cos que favorecer o financiamento de proxectos que contribúan á consecución dos **novos obxectivos que deberán alcanzar as entidades locais no ámbito das súas responsabilidades e competencias e que son de obrigado cumprimento a curto prazo.**

Entre os novos obxectivos, a Directiva (UE) 2018/851, do Parlamento Europeo e do Consello, do 30 de maio de 2018, pola que se modifica a Directiva 2008/98/CE contempla:

- No que respecta aos obxectivos de preparación para a reutilización e reciclado de residuos municipais, fixéronse obxectivos ambiciosos para o medio e longo prazo: 55 % para 2025, 60% para 2030 e 65% para 2035.
- Incluíuse, entre outros, a obrigatoriedade para os Estados Membros de asegurar a recollida separada de biorresiduos (ben separando e reciclandos de orixe, ou ben recollendos de forma separada e sen mesturalos con outros tipos de residuos), como moi tarde o 31 de decembro de 2023, para o seu tratamento.

2.- Cal é o procedemento de concesión para estas axudas?

Segundo o establecido no artigo 10 das bases reguladoras o procedemento que se empregará para a concesión das axudas será o de **concorrenza non competitiva** contemplado no artigo 19, apartado 2º da Lei 9/2007, de subvencións de Galicia. Isto é, que todos os concellos que cumpran os requisitos sinalados na Orde poderán obter a subvención solicitada en función dos criterios de reparto establecidos nesta.

3.- Cales son as liñas subvencionables desta convocatoria?

a) Liña 1: Proxectos de implantación , ampliación ou mellora de **recollida separada de biorresiduos** destinados a instalacións específicas de tratamento biolóxico (Compostaxe e/ou dixestión anaerobia).

b) Liña 2: Proxectos de separación e reciclaxe en orixe de biorresiduos mediante a súa **compostaxe doméstica ou comunitaria (*compostaxe in situ*)**.

4.- Que concellos poden solicitar esta axuda?

Poderán ser beneficiarias as **entidades locais municipais e supramunicipais e agrupacións de entidades locais de Galicia**, que cumpran os requisitos establecidos no artigo 2.1 para cada unha das liñas subvencionables.

5.- Debe imputarse orzamento en todas as anualidades?

As solicitudes recibidas deben manter a proporción orzamentaria do crédito xerado, polo tanto o importe da subvención solicitada para o ano **2023 debe ser o 10% do total, para o 2024 será do 90% do total**.

6.- Pode optar unha mesma entidade local a máis dunha subvención ao amparo desta convocatoria?

Si, segundo o establecido nas bases reguladoras é posible que una mesma entidade local concorra a esta convocatoria de maneira simultánea para as dúas liñas subvencionables a que se refire o artigo 1, pero se o proxecto ou proxectos para os que solicite a subvención pertencen a liñas subvencionables distintas deberán presentar unha solicitude por cada liña (Anexo I).

O que non é posible é que unha entidade local concorra á convocatoria de maneira simultánea e para a mesma actuación de maneira individual e a través da entidade supramunicipal ou agrupación na que se integre (art. 2.3 das bases reguladoras).

7.-Pódese ter implantada a recollida separada de biorresiduos no concello e solicitar a subvención?

Si, dado que se pode solicitar subvención para **ampliación ou mellora** de recollida separada de biorresiduos destinados a instalacións específicas de tratamento biolóxico existente na actualidade.

8.- Poden solicitar a subvención unha agrupación formada por concellos que se atopan en diferentes situacións, é dicir, que non exista a implantación nuns e que noutros concellos só a teñan implantada en parte do seu territorio?

Non habería ningún problema, pero todos os concellos que integre a agrupación voluntaria deben cumprir os requisitos, condicións, obrigas e compromisos establecidos nesta orde.

8.1 Por exemplo, pode un concello solicitar de forma independente pola liña 2 e a través dunha Mancomunidad pola liña 1, ou viceversa?

Pode presentar a solicitude independente sempre e cando sexa para unha actuación (liña) diferente á que se solicite a través da Mancomunidad.

8.2 Aínda que estean adscritos a distintas plantas de transferencia, poden os concellos solicitar as axudas de forma conxunta ou a través da Mancomunidad?

Si. Os concellos pódense agrupar independentemente da planta de transferencia que teñan asignada.

9.- Cal sería a porcentaxe máxima subvencionada?

O financiamento máximo outorgado para as actuacións reguladas nesta orde de axudas non excederá o **90% do custo total do proxecto**. A porcentaxe restante, será asumida polo beneficiario/a e será compatible co financiamento que os beneficiarios poidan recibir doutras administracións, sempre e cando non supere o custo total do proxecto a financiar.

O financiamento achegado **non é compatible** cos Proxectos Clima, promovidos a través do Fondo de Carbono para unha Economía Sustentable (FES-CO2).

10.- As cantidades a subvencionar nesta orde son con IVE ou sen IVE?

Os importes máximos considerados ao abeiro desta Orde son importes **SEN IVE** xa que segundo se indica no artigo 4.2.b **non será un gasto subvencionable o imposto sobre o valor engadido**. Será a entidade beneficiaria da axuda a que teña que soportar directamente o importe sobre o valor engadido (IVE).

10.1.- Entón, á hora de cumprimentar os anexos que importe se debe indicar?

Sempre se deben **indicar todos os importes sen IVE**, así por exemplo cando indiquen o importe total do proxecto a este débesele descontar o IVE.

10.2.- Como se calcula o custe do proxecto?

O custe do proxecto é o importe total que haberá que pagar para levar a cabo a actuación. A orde de axudas financiará ata o **90% do custo total do proxecto (sen IVE)**, polo tanto o **10% restante máis o 21% de IVE do total do proxecto, correrá a cargo da entidade beneficiaria**.

11.- Nesta convocatoria de axudas, tería algún beneficio financiar máis dun 10%?

Non, xa que a concesión da axuda rexe polo procedemento de concorrència non competitiva.

Ademais debe de lembrarse que a entidade beneficiaria tamén se ten que facer cargo do IVE ao non ser un concepto subvencionable.

12.- A orde de subvencións contempla o pago de anticipos?

Sí, o artigo 23.2 da Orde prevé a posibilidade de que as entidades que resulten beneficiarias soliciten o **pago anticipado de ata o 50 %** do importe de subvención concedida.

As entidades beneficiarias que queiran acollerse á modalidade de pagamento anticipado, deberán manifestalo expresamente no **prazo máximo de 10 días hábiles a partir do seguinte ao da notificación da resolución de concesión**, mediante a presentación da correspondente solicitude de pagamento anticipado, empregando o modelo que se incorpora como anexo VI e dispoñible na Sede electrónica (MT975P).

13.- Onde debo presentar a solicitude?

As solicitudes presentaranse obrigatoriamente por **medios electrónicos** a través do formulario normalizado dispoñible na sede electrónica da Xunta de Galicia, <http://sede.xunta.gal> (Código de procedemento MT975P).

O órgano responsable é a Dirección Xeral de Calidade Ambiental, Sostibilidade e Cambio Climático.

14.- Cal é o prazo de presentación?

O prazo de presentación de solicitudes será desde o día seguinte á publicación da convocatoria no DOG e ata o **30 de outubro de 2023**, ou no seu caso, ata o esgotamento do crédito previsto.

15.- Que documentación debo presentar?

O **Anexo I (formulario da solicitude)** onde se indicarán as actuacións e conceptos subvencionables aos que concorren nesta convocatoria, así como o investimento (sen IVE) e a temporalidade de execución previstos, este anexo debe **completarse coa documentación sinalada no artigo 7** da Orde:

- a) Acreditación do nomeamento da persoa representante para as súas relacións coa Consellería de Medio Ambiente, Territorio e Vivenda.
- b) Certificación do/da secretario/a do concello en que conste o acordo adoptado polo órgano competente e que recolla a decisión da entidade ou entidades locais polo cal se aproba a súa participación nesta convocatoria (anexo II).
- c) Certificación de que a entidade solicitante remitiu ao Consello de Contas de Galicia as contas do último exercicio orzamentario a que legalmente está obrigada. Nesta certificación deberá quedar acreditado que a remisión das contas se efectuou antes do vencemento do prazo de presentación de solicitudes (anexo II).
- d) Declaración, por parte da entidade solicitante, do compromiso en relación coa execución de actuacións do Plan de Recuperación, Transformación e Resiliencia (PRTR) no senso do artigo 8, apartado 2.e), da Orden HFP/1030/2021, do 29 de setembro, do

Ministerio de Facenda e Función Pública, pola que se configura o sistema de xestión do Plan de Recuperación, Transformación y Resiliencia (anexo III).

e) No caso de solicitudes relativas tanto para a liña 1 como para a liña 2, deberán presentar:

1º. Anexo I en función da liña solicitada, debidamente cuberto e asinado.

15.1.- No caso de solicitudes presentadas por agrupacións de entidades locais, que documentación se deberá de achegar na solicitude?

Ademais da documentación detallada no apartado anterior, deberán achegar a seguinte documentación:

1º Anexo I. debidamente cuberto e asinado.

2º Documentación xustificativa da persoa ou entidade local designada para actuar como representante para formular a solicitude presentada.

3º Identificación e relación de entidades locais participantes.

4º Xustificación, de que as persoas representantes das entidades locais participantes autorizan a presentación da solicitude, así como no relativo á remisión das contas do último exercicio orzamentario a que legalmente están obrigadas ao Consello de Contas (Anexo II).

5º Os compromisos de execución asumidos por cada membro da agrupación.

6º O importe da subvención que se vai solicitar para cada entidade membro de agrupación.

7º Anexo de pluralidade de solicitantes (anexo VIII).

15.2.- Quen ten que presentar a declaración responsable na que se faga constar que se dispón de crédito suficiente no orzamento da entidade local para o pagamento?

Tendo en conta que o importe máximo da axuda non será superior ao 90% do custo total do proxecto, **todos os concellos deberán facerse cargo do 10% restante do orza-**

mento do proxecto (ademais do IVE), polo que todos os concellos deberán de presentar a declaración responsable sinalando que dispoñen de orzamento para sufragar esa contía.

16.- Se unha entidade local quere optar ás dúas liñas de actuación contempladas na orde, deberá presentar na sede electrónica dúas solicitudes (unha para cada liña), ou unha única solicitude coas dúas liñas?

Para o caso de que a entidade local queira pedir máis dunha subvención para proxectos que estean englobados na liña 1 ou na liña 2 **deberá presentar solicitudes independentes.**

17.- Cal debe ser o contido mínimo da memoria de solicitude?

Non hai que presentar memoria do proxecto ou actuación no momento da solicitude, pero si unha vez rematada a actuación. Esta memoria deberá xustificar o cumprimento das condicións impostas na concesión da subvención, na que se identifiquen as actividades realizadas e os resultados obtidos. No artigo 22 da Orde detállase o contido mínimo desta memoria xustificativa segundo a liña de subvención da que se trate.

18.- É obrigatorio levar a cabo campañas de difusión e sensibilización?

Nesta Orde, en réxime de concorrencia non competitiva, as entidades que soliciten a axuda **non teñen a obriga de realizar campañas de difusión e sensibilización**. No artigo 3 da Orde sinálanse as campañas de información, difusión e sensibilización como un concepto financiable para a liña 1, e os requisitos que deben cumprir no caso de que se queiran realizar.

Ao igual que para a liña 2 se sinalan actuacións de formación, difusión, carteis explicativos como conceptos financeiros e os requisitos a cumprir se se deciden levar a cabo.

18.1.- Podería solicitarse axuda unicamente para a realización dunha campaña de información?

Si se podería pero **sempre que este asociada a un proxecto de implantación, ampliación ou mellora** da recollida separada de biorresiduos ou compostaxe in situ. Por outra banda, na redacción da memoria xustificativa das actuacións, que se terá que presentar

na fase de xustificación, deberá de explicarse a mellora que supuxo para o proxecto presentando un indicador que corrobore dita mellora.

19.- Cal é o prazo de execución (período subvencionable) dos proxectos subvencionados ao amparo desta orde?

O artigo 19 establece que o **período subvencionable** será, con carácter xeral, o comprendido entre o **1 de marzo de 2020 e o 30 de decembro de 2024**, ambos incluídos, ben que condicionado ao exercicio orzamentario ao que se queira imputar e tendo en conta as datas límite para a súa xustificación segundo o sinalado neste mesmo artigo.

Non serán subvencionables os proxectos concluídos materialmente na data de presentación da solicitude. Entenderase que un proxecto está concluído materialmente cando estea implantado e en funcionamento.

19.1.- Cal é a data límite para presentar a documentación xustificativa?

A data límite para executar o proxecto e presentar a documentación xustificativa dos investimentos será:

- a) O **30 de decembro de 2023** para os proxectos que se imputen ao orzamento correspondente á **anualidade 2023**. Incluíranse neste orzamento as actuacións executadas entre o 1 de marzo de 2020 e o 30 de novembro de 2023, no seu caso.
- b) O **30 de decembro de 2024** para os proxectos que se imputen ao orzamento correspondente á **anualidade 2024**.

19.2.- En canto aos procedementos de contratación públicos, que documentación teñen que presentar as EELL no momento da xustificación?

As EELL teñen que presentar unha certificación expedida pola secretaría, na que se acredite que se respectaron os procedementos de contratación pública e se faga constar a aprobación por parte do órgano competente da conta xustificativa da subvención.

20.- Establécese un prazo nesta orde para ter implantado a recollida separada e/ou compostaxe ins situ dos biorresiduos?

As entidades locais que opten a estas subvencións adquirirán o **compromiso** firme de implantar a recollida separada e/ou a compostaxe in-situ dos biorresiduos, segundo a axuda concedida, **como máximo antes do 30 de decembro de 2025**.

21.- Existe unha previsión en canto a datas da posta en marcha das plantas de compostaxe e transferencia ao longo de territorio?

O obxectivo da Xunta e de SOGAMA é apoiar ás Entidades Locais cara a garantir o cumprimento das directrices fixadas por Europa en materia de reciclaxe e implantación da recollida separada dos biorresiduos a través da creación dunha rede de infraestruturas para garantir a súa correcta xestión e tratamento na Comunidade. Está previsto que esta rede estea completada, na súa maioría, a finais de 2023.

22.- Que se consideran "actuacións" no artigo 3? Serían o mesmo que "conceptos financiáveis"? É dicir, un concello podería pedir a subvención de forma individual, para biotrituradores na Liña 1 e ao mesmo tempo podería solicitar coa Mancomunidade a adquisición de contedores?

As actuacións non son o mesmo que os conceptos financiáveis. As actuacións son as liñas subvencionables, por tanto, non podería concorrer a unha mesma liña subvencionable de forma individual e á vez como agrupación ou entidade supramunicipal.

23.- Pódense subvencionar os custos do servizo de recollida selectiva ou tratamento dos residuos?

Ao abeiro desta orde **non se consideran conceptos subvencionables os custos do servizo de recollida selectiva**, o tratamento dos residuos así como tampouco os custos de mantemento nin os alugueres. Os conceptos financiáveis aparecen recollidos no artigo 3.

24.- A actuación de implantar a recollida selectiva de biorresiduos refírese a implantala no 100% da poboación?

Ao abeiro deste orde de axudas non é necesario que se solicite a axuda para a implantación en todo o territorio do concello. A entidade solicitante deberá decidir a que porcentaxe da poboación quere destinar o proxecto, en función do modelo de xestión que mellor se axuste ás súas características. A asignación económica por habitante contemplada nesta orde debe considerarse soamente como unha axuda para fomentar a devandita implantación. Non obstante, nos proxectos/memorias que se presenten durante a fase de xustificación da subvención, deberá especificarse a poboación atendida.

25.- Como se valora o grado de implantación dunha liña? En nº de contedores/habitante? nº de kg recollidos/hab?

O grao de implantación valorarase en función da poboación atendida por cada modelo de xestión dos biorresiduos.

26.- É subvencionable un contrato de software de GPS?

Non é un concepto subvencionable.

27.- Na liña 2 de compostaxe in situ, en conceptos financiáveis, serían subvencionables os composteiros individuais de cociña? Os pensados para pisos?

A orde de axudas inclúe como conceptos financiáveis os "Composteiros domésticos": *Composteiros para vivendas unifamiliares con xardín ou horto nos que se depositen e se composten os biorresiduos*". Polo tanto, as vivendas ás que se destinen os composteiros domésticos deberán cumprir con esta definición.

28.- No concepto subvencionable na liña 1 destinado a sistemas de identificación de usuario e pesada, sería so para contedores na vía pública ou tamén podería entrar dentro da subvención este sistema para a achega dos biorresiduos aos centros de compostaxe comunitaria?

Os sistemas de identificación e pesada son un requisito que se deberán permitir incorporar nos contedores para a vía pública (artigo 3.1 a) nos que se realice a recollida separada dos biorresiduos. Os sistemas de identificación e pesada non se sinalan como concep-

to subvencionable dentro da liña 2 (compostaxe in situ) polo que non se consideran subvencionables neste caso.

29.- O importe para a adquisición dun camiión para a liña 1, é a maiores do importe máximo da axuda a que pode optar unha entidade local?

Si. No caso de que o concello solicite axuda para a adquisición do concepto subvencionable "Camiións para a recollida de biorresiduos" o importe solicitado non se detraerá da contía máxima da axuda correspondente da entidade en función do número de habitantes. Para a adquisición deste concepto subvencionable non se establecen límites máximos debendo ser o importe solicitado adaptado á realidade do mercado. Asemade, **solo se financiarán camiións eléctricos ou de biogás de orixe renovable, e preferiblemente non compactador.**

30.- Que contido debe incluír o plan de traballo contemplado nas campañas e ou actuacións de información, formación e seguimento financiadas?

O plan de traballo esixido para o financiamento de actuacións de formación, difusión e seguimento dos proxectos debe contemplar unha planificación das tarefas a realizar, cunha aproximación das datas, duración, e recursos humanos e materias necesarios para cada tarefa/actuación.

Será obrigatorio por parte dos beneficiarios das liñas de axudas 1 e 2 a **realización dun seguimento da actuación** que garanta o cumprimento dos obxectivos marcados no proxecto.

31.- Nas actuacións de formación e seguimento do proxecto en compostaxe in situ, inclúense as actuacións de seguimento do proxecto. Sobre isto, a guía que habería que entregar a cada vivenda participante é para composteiros individuais ou tamén para composteiros comunitarios?

As guías dirixidas á poboación participante, como actuación de formación e difusión, deberán elaborarse e distribuírse tanto para os proxectos de compostaxe doméstica como de compostaxe comunitaria, acorde coa tipoloxía de proxecto que se desenvolva.

32-. A Entidade local solicitante terá a condición de entidade executora?

Sí, de conformidade co exposto no artigo 3.k) da Orde HFP/1031/2021 de 29 de setembro, se lle otorga a condición de entidade executora, aos concellos que teñan asignado un subproxecto, é dicir cando reciban fondos destinados á realización de accións contempladas no Plan de Recuperación Transformación e Resiliencia (PRTR).

Nestes supostos, se facilitará toda a información de seguimento que precisen, así como a información preceptiva que deben proporcionar ao sistema de información de xestión e seguimento do PRTR conforme no disposto na Orde HFP/1031/2021, e na Secretaría Xeral de Fondos Europeos para cumprir cos fitos e obxectivos requeridos nesta materia.

33-. E como se procederá para poder dar cumprimento as obrigas preceptivas nesta materia?

Nestes supostos, organizarase unha reunión por parte da Xunta de Galicia para o apoio das obrigas que como entidades executoras terán que cumprir. Ademais, poderán obter asistencia técnica e dinamización da participación das administracións públicas no Plan de Recuperación, Transformación e Resiliencia, mediante a adhesión ao convenio coa Secretaría Xeral de Fondos Europeos (SXFE) e TRAGSATEC, outorgándose preferencia as Entidades Locais, especialmente aquelas que contén con menos de 5.000 habitantes. Para levalo a cabo, poderán facer a súa inscrición a través do seguinte enlace:

[https://www.fondoseuropeos.hacienda.gob.es/sitios/dgpmrr/es-es/Documents/
2023%2004%2011%20PROTOCOLO%20DE%20ADHESI%20AL%20SERVICIO
%20DE%20ASISTENCIA%20T%20CNICA%20Y%20DINAMIZACI%20TRACSATEC%20EN%20EL%20PRTR%20LOGOS.pdf](https://www.fondoseuropeos.hacienda.gob.es/sitios/dgpmrr/es-es/Documents/2023%2004%2011%20PROTOCOLO%20DE%20ADHESI%20AL%20SERVICIO%20DE%20ASISTENCIA%20T%20CNICA%20Y%20DINAMIZACI%20TRACSATEC%20EN%20EL%20PRTR%20LOGOS.pdf)

34-. E no tocante ás agrupacións municipais? Poden ter estas a condición de entidades executoras?

Si. Neste suposto, se designará unha única entidade local como entidade executora do subproxecto, que será á que se lle asignarán os fondos públicos e asemade, será esta entidade, á que lle corresponderá a formulación do informe de xestión-certificado do subproxecto, mediante certificación do seu Secretario. A estes efectos, ao resto de entidades locais participantes no subproxecto, formalizarán o resultado da xestión realizada mediante actuacións, ou outras liñas de acción, certificando documentalmente a súa

contribución en términos equivalentes ao informe de xestión requirido a nivel da entidade executora.

35.- E se teño algunha dúbida acerca desta convocatoria, onde debo dirixirme?

A Consellería de Medio Ambiente, Territorio e Vivenda pon ao dispor dos interesados a seguinte dirección de correo electrónico: axudas.cmaot@xunta.gal.

Todas as consultas deberán dirixirse a este enderezo e serán contestadas por correo electrónico. Así mesmo, irase actualizando o documento de preguntas frecuentes que estará publicado na páxina web do SIRGa.